

閑止書堂集鈔

全

閑止書堂集鈔 (清) 陳夢雷著

上海古籍出版社出版

(上海新興路五號)

上海市印刷七廠印刷

長華書局上海發行所發行

各地長華書局經售

一九七九年九月第一版

一九七九年九月第一次印刷

開本：六一〇乘一三七二毫米十二分之一

印張：十六又三分之一 印數：一——六四〇〇部

統一書號：一〇一八六·一二七 全一册 編訂本定價：三元八角

《清人別集叢刊》編印緣起

一、在馬列主義、毛澤東思想指引下，全國億萬人民正爲實現黨的十一大路線和五屆人大提出的新時期的總任務，開始新的長征。一個建設社會主義科學文化事業的繁榮時期，即將到來。爲了適應學術研究日益增長的需要，我們遵照毛主席關於「古爲今用」、批判繼承和清理我國古代文化遺產的一系列指示，決定有計劃地進行部分的古籍影印工作，作爲古籍整理出版工作中的一個組成部分。

二、清代是我國歷史上封建社會的末期，鴉片戰爭後又淪

爲半封建半殖民地社會，三百年間，在政治、經濟各方面都有重大的變化。它上承二千餘年封建社會的殘局，下開百年來近代史的新面，表現在文化學術上，具有不少成就，留下了大量的著述和作品，值得我們今天來鑽研探索。《清人別集叢刊》的刊行，就是試圖從衆多的清人著作中，以作家爲主，選擇其內容較有價值、板刻較精而又流傳稀少的集子，分輯（每輯若干種）影印，爲學術界提供研究資料。

三、本叢刊所收別集，其思想內容上的選擇標準如下：（一）在文藝上較有成就，或能代表一種傾向和流派的；（二）在思想史上有較重要地位，或影響較大的；（三）在學術研究上有相當

貢獻，可供今天借鑑的；（四）保存史料較多，可藉以考見當時政治、經濟和文化等方面的若干情狀的。

四、本叢刊於所收別集的板本，皆力求精善，全部影印，以期保存原書面貌。板本選擇原則如下：（一）未經刊刻者盡量用稿本或精鈔本；（二）已經刊刻者盡量用原刻初印本，或經原作者校正增補的定本。

五、由於我們對影印古籍的經驗不足，而於清人別集的調查研究也未能深入，工作中一定會存在很多缺點，熱切地盼望讀者和專家們隨時指正。

最後，本叢刊在編印過程中承國內各大圖書館熱忱協助，

提示對選題的意見，並惠借最精板本，對此我們表示衷心的感謝。

上海古籍出版社 一九七八年十月

出版說明

《閑止書堂集鈔》詩、文各一卷，清陳夢雷著，康熙間坊刻本。

夢雷字則震，號省齋，晚號松鶴老人，福建侯官（今福州市）人，順治七年（一六五〇）生。少有才名，康熙九年（一六七〇）中進士，選庶吉士，授編修。

清初吳三桂、尚可喜、耿精忠三藩之亂，陳夢雷適回籍省親，爲耿精忠逼授官職。當時，和陳夢雷同年舉進士、同官編修的李光地也回籍在福州。兩人即合謀，陳夢雷留耿處作內

應，探聽消息；李光地離閩北上，向清廷合進蜡丸密疏，遞送情報。李光地至京後，獨上密疏，將蜡丸之事，據爲己功，因而大受康熙的賞識，青云直上。三藩之亂平後，陳夢雷以叛逆論斬，幸得徐乾學密爲開脫，減死謫戍瀋陽。康熙二十一年（一六八二）赴戍所，在瀋陽凡十餘載，在當地從事教書和編修地方志，曾編有《奉天通志》等。

康熙三十七年（一六九八）東巡瀋陽，陳夢雷獻賦稱旨，得以「賜環」，召還京師。第二年，他被派到康熙第三子誠隱郡王胤祉處侍讀。這時，皇太子胤礽以病狂失寵將廢。康熙其他諸子皆喜招攬賓客，顯其一技之長，希冀獲得康熙的恩寵。

夢雷即爲胤祉搜輯古今圖書，纂修彙編。他根據胤祉頒發的協一堂藏書和家藏的經、史、子、集約計一萬五千餘卷，僱人繕寫，「上下古今，類列部分，有綱有紀，勒成一書」。此項工作始於康熙四十年（一七〇一）十月，他「目營手檢，無間晨夕」，至康熙四十五年（一七〇六年）四月，書乃告成。這就是我國著名的一部大型類書《古今圖書集成》。全書一萬卷，另有目錄四十卷，分六編，三十二典，共六千一百零九部。各部先彙考，次總論，有圖表、列傳、藝文、紀事、雜錄、外編等項目。內容繁富，區分詳晰，便于檢閱。這是陳夢雷一生中最主要的成就，也是他對我國文化事業所作出的重大貢獻。

當時，康熙對陳夢雷頗爲眷寵，曾賜宅城北，並親至其齋中，書「松高枝葉茂，鶴老羽毛新」一聯。夢雷即以「松鶴」兩字名其齋。他的《松鶴山房詩文集》亦於此時編成，卷首所附楚師、黃鸞來等撰寫的序文，盛稱夢雷的「功德」，便足以說明其當時的際遇。

一七二二年，康熙帝病逝。胤禛即位，是爲雍正帝。雍正一上臺，便迫害和殘殺同他爭奪帝位的兄弟，胤祉也獲罪被禁錮。於是，陳夢雷又遭譴責，復謫戍黑龍江。乾隆六年（一七四一），卒於戍所。

這部《閑止書堂集鈔》，係陳夢雷之僕楊昭抄錄編集，康

熙癸酉（一六九三）刻印於福州。當時，陳夢雷正第一次謫戍瀋陽，「有懷莫剖，負謗難明」，抑郁哀怨，不能自己，因而在不少詩文中抒發了他的這種心情。其中的《絕交書》與《告都城隍文》，更系統地揭露了李光地欺君賣友、護短貪功的經過，悲憤之狀，溢於言表。

陳李之爭，為清初有名公案之一。因李光地歷居要職，有關史籍對此皆語焉不詳，《清史稿·李光地傳》甚至認為「及精忠敗，夢雷以附逆逮京師，下獄論斬。光地乃疏陳兩次密約狀，夢雷得減死戍奉天」，與夢雷所述截然不同。《閑止書堂集鈔》從陳夢雷一面，提供了有關這一公案的罕見史料，這對於

研究陳夢雷的生平以及清初史事都很有參考價值。最近我們發現蘇州圖書館藏有此流傳絕少之書，特據以影印出版。

上海古籍出版社 一九七九年九月

序

嗟乎人生何不幸而才才矣又何不幸而
年少掇高第翱翔禁近爲文學侍從之臣
天且靳之使之躬歷變亂艱辛百折以自
致其一飯不忘之情至行可以貫金石而
孤忠見誅於讒口一心可以共白於天下
萬世而梏於同事之貪功遂至使萬死一

生報

國之謀無一得達

君父而且惡名橫被負罪遠竄惴惴淵冰旦
夕集蓼萬里高堂痛深含歛胥今古才人
不幸之遭咸萃一身此余讀省齋先生詩
文不禁悲嘅憤懣掩卷太息深疑彼蒼之
難問也當耿逆構亂之始先生自經不死

披緇不免脅刃相見抗言求死又不得既
而逼授僞職引疾固辭瘠形尪羸視息僅
屬而能精白自矢激勵同心間道通誠潛
圖反正故其著爲詩文憂愁拂鬱浩氣奔
泄如疾風寒夜金鐵皆飛又如深巖流泉
鳴聲幽咽至使讀者扼腕流連涕下是天
雖能困厄其身而其詩文之自爲煜爚光

月二
7
亾萬丈則有不可掩者正如昌黎之論子
厚斥不久窮不極雖有出於人其文學詞
章必不能自力以致必傳於後無疑若不
幸之中又有其甚幸者先生亦何憾於天
哉方逆變時余僑居江南梓里有心往來
傳聞先生事一二大略無不憤歎丁卯歲
薄遊遼左得交先生盡讀其詩文悉事本

未爲之扼腕裂眚先生雍容遜謝無幾微
怨懟之色惟以不獲抗節捐軀爲罪昔唐
祿山之變從逆諸臣以六等定罪王維獨
以凝碧池詩上聞得解而杜少陵又贈之
詩所謂一病明主三年此心者然後維之
心蹟顯白暴著皦然被汙泥而不染今先
生詩文無遜於維凝碧之作固非一而足

况又密謀請師解散黨援削弱賊勢功百
倍於維者乎聞先生對簿時秋曹讞詞擬
從大辟舉朝咸爲咨嗟歎憤甚且爲之流
涕卒無昌言爲白者獨賴

上恩減等是

聖天子已知其寃矣然其報

國苦衷終未大著余歸里日適其僕楊昭

攜手抄先生閑止書堂集一冊同里諸子
爭取聚觀鑿金謀梓以傳庶幾爲有目之
所共覩或得值少陵者出歌詠其事是先
生雖屈一時終伸萬世天道固有不爽者
乎至于先生著作卷帙繁富是刻所登不
過十之一二閩地遼左相去八千里無從
求索全集之梓不能不俟後之君子是爲

序

崑

康熙癸酉春季之吉同里黃鶯來拜撰

閑止書堂集鈔

目錄

卷之一

賦

木瘦瓢賦

西洋貢獅子賦

杼哀賦

書

絕交書

傳

李葆甫傳

解介士傳

序

送官子之蓋州序

雜文

丁巳秋道山募建普度疏

告都城隍文

爲心月上人書紙

卷之二

五言古

擬古詩十九首

西郊雜咏廿首

寄答李厚庵百韻

黃叔威以古詩八首見贈擬古妾薄命以答之
華嚴嶺

七言古

松樹爲風雨所拔嘆

贈黃西津總戎海澄

劍俠

題友人墨竹

行路難

海門行

五言律

丙辰春日登凌霄

春暮過烏龍江戰地

泉郡夜半聞警

留別許不棄

建溪舟行四首

雨夜泊桐廬

吳門觀競渡

崇明渡海

雨中望金山

寶應道中

淮上阻水小舟夜泊臺兒庄

寄家書

燕邸書懷

作書友人投筆誌恨二首

寄長秋弟

夜坐聞笛

月夜感懷

歸懷

庚申上元同楊道聲題汴梁旅店

七言律

乙卯秋送友之延津

友人問疾坐有鼓琴者命余續彈未果因貽余
詩有琴聲無復後人彈之句遂依韻奉和

哭范制臺二首

秋興八首

上巳日舟行遊鼓山

宿解院

湧泉寺

登劣崩峯二首

立秋後一日至都門卽事賦感四首

陽山書堂集金
目錄
潞河卽事有感贈主人

易水懷古

擬遊五臺山不果

楊椒山先生祠

宿桑乾題壁

己未入都江干畱別諸同學

寄三弟

西曹坐繫書懷兼寄兩弟五首

東行口占三律

癸亥春日卽事二首

灌花卽事

五言排律

贈秘書覺道弘

贈臬憲于公

題寧海將軍白沙受降圖

七言絕句

瀨溪道中

自題小影

題寧海將軍鳳城歸欵圖

耿又樸年兄以三絕句見慰走筆步韻志感

閑止書堂集鈔卷一

候官陳夢雷省齋氏著

施奇文介平

羅擢錦元邵

同里陳發曾世承校閱

許遇月溪

施琰又韓

木瘦瓢賦

繫元化之紛綸兮陰陽運而參差萬有變而莫紀窮

兮昊蒼主宰而何私產五材以利用兮曲直判而爲
民資何斯物之異稟兮輪菌蹙鬱以增奇旣方之不
可以爲筐兮亦圓之不可以爲管極摩杪以致精兮
終詰屈而齟齬樵蘇採伐而棄捐兮幸得免乎薪煮
彼何不聳幹而強何不發艷而芳何不夭喬千尺而
挺拔乎豫章何不結蓋扶疎而作蔭乎廟廊乃色黜
而蒼體狹而剛節不完兮獨苦心非蠹兮自傷徒供
匠石之斲取用挹注乎酒漿吾聞神理之舛錯兮湫
浩浩其無涯陽烏或蔽於陰靈兮夜光蝕於妖蠶沙

在泥而俱黑兮璧受玷而微瑕固遭逢之不幸兮奚
庸深其嘆嗟抑又聞岳瀆之蜿蜒兮氣蒸鬱而興雲
洪波之浩淼兮風摧激而成紋金在冶而耀輝兮香
入火而吐芬彼磊砢盤錯之糾尋兮又安知非造物
之慙懃然則順逆由天屈伸以理或直節以孤標或
委蛇而受訾彼樛曲之苟完非本願之得已惟素質
之不虧匪君子之所鄙睹丹漆之輝煌兮滑澤脂韋
而易毀也金罍玉笋之璀璨兮小器盈而自侈也若
茲之堅貞而可久兮固將擬乎夏鼎與商彝兼樸茂

閣上書堂集金
卷之一
而有文兮奚俟刻雲雷而繪蝨螭惟哲人之素修兮
感曲成之奇姿調太羹而注黃流兮薦馨香而攸宜
本希世之爲珍兮彼俗好其焉知亂曰山嵯峨兮崧
萃水激湍兮發發操一瓢兮獨酌濯清泉兮汲明月
思美人兮一方聊俛仰兮以歇

抒哀賦

夫何二儀之翕闢兮變窈杳而難窺貞表糺糅以任
剝復兮叢頽焱忽其不可思匪寧澹括索以窮化原
兮疇炳晰乎先幾信貿貿偃蹇以倅激兮困荼酷而
莫與追渺余躬之載誕兮皇降衷其猶弗慝式庭訓
於髫鬣兮景曩拮爲繩墨漱沆漑以致清兮刈幽蘭
以爲襲縞寶璐與瑤英兮紛組纓以綴飾戒炫靡以
要媵兮恒遵晦以飭默固時命之偶值兮盍用薦於
王國余旣遵路以馳驅兮端軌度以爲趨謂吾道其

無尤兮忘時命之不可虞神情悅於義皇兮志過亢
而無徒擢嘉穀以遠蕘兮匪荃蓀其弗俱信趣捨其
允臧兮不度世之委紆值皇風之清泰兮行蹢躅其
猶晏如體養志以娛親兮駕言返於故閭就頤而致
困兮蜂蠆忽於所圖嗟天步之蹉躓兮長蛇游其肆
虐童昏侈而踵步兮驅狂瞽而蕩魄挾腐鼠以哈鸞
兮畢四周其焉薄余不難速隕以濯癢兮顧天性而
爰度彼績屨於方寸兮古處其或弗過不渙忍以劇
秦兮庶余心之靡他甘疾首以就疵兮長紆鬱其則

那余衷其多汲汲兮寧晏晏於寢訛余旣嗾韓盧以
搏魏兮田父猶遭迴而踏步挈虬首以齧齧兮何將
伯之却顧驥蹟於淤沕兮驂又淖泥而弗寤搏蕭艾
爲蕙蒞兮庶用遺乎遠路苟微芳之見御兮猶足諒
余之貞素余漫不程力以負山兮誠與願其幸弗違
嗟鵲巢之卒瘁兮疇偃仰而安居進舍階而莫登天
兮退復據於蒺藜雖徬徨其終不詭隨兮堅自信而
勿萎鬱陶之惘惘兮歲忽忽其將晚戒糗糒以揚舲
兮載鳴鸞而陟巘叩九關以竭誠兮及離思之未遠

何虎視之耽耽兮九首拔木而莫縮旣輪困蟠屈之
莫爲容兮迴朕車其復返余豈不知早擇朋以自導
兮謂遂心其焉恤也慮竭於公家兮躬弗閱其非辱
也恃九臯之聞天兮或所思之我淑也聊息駕以埃
時兮忘謠詠之莫或暴也衆口之爍金兮萋菲積而
日滋余復悻悻以賈殃兮曾囊括之罔規市虎其猶
傾聽兮矧往愬之侈辭震厲已及余躬兮猶惘惘其
如疑荆棘之充路兮橋踰淮而復爲枳蓬依棘而得
挺兮厥質仍夫骹骹堯舜之聰明兮終藉臯陶以爲

理誠返顧而諒直兮雖縲紲其焉耻援靈均以永言
兮釋義文之所指

明主其終莫予訖兮恐親心之悲遊子何嘗殃之叢脞兮
曾余躬之弗戕宵告夢以不祥兮陟吧望而內傷旦
得告而魂怔兮瞻四周而潰腸號天其莫援兮觸地
而無傷淚崩泉而繼血兮足躡踊而就僵神漠漠其
聞滅兮息瞠奄其渺茫守者環而涕下兮欲進規而
若憮謂拘囚而致隕兮典守嬰其罪罟矧覆盆之未
剖兮躬頽摧其焉取哀固有地與時兮毋荼毒而就

山書堂集 卷之一
瘦撫予背以就衾兮支余頤而進漿聽汨汨其若蓮
兮語刺刺其若芑目冥冥而啓矚兮膺結痛而復涕
滂良朋之欵欵兮趨就訊而先潛願節毀以庀形兮
據禮經以爲斷喪有疾其引權兮矧銀鐙之在絆母
使慈母戚於重泉兮嚴親聞而永嘆忠孝之兩訖兮
孰臧否之能判恫余思之憤憤兮耳有覺而夢夢氣
扼於拘攣兮痛軫結而攻中精爽越而淚凝兮視翳
翳其若矇襲季冬之長夜兮卒律颺颺而號悲風月
閣閣其入帷兮雪霰颯沓浙瀝而下濛衆寐噏息以

交斲兮撼余寤而震恫余悲其曷弭兮援古而莫余
似玉門之演畫兮文明以自矢姬公之困鷓鴣兮嬰
跋蹵而兀兀彼上聖之偶齟齬兮惟道在而傾否巷
伯其猶賢兮哆哆而成貝錦屈子之拳拳兮唯沉湘
則何甚固君子之道消兮要皆在躬之坎壈何昊天
獨降余以閔凶兮奪所恃以何窮省侍莫余親兮藥
石莫余供徒跋涉以閱年兮豈王事之匪躬冀釋瑕
以長往兮奉菽水而融融卒冉冉以邁此殃兮痛挽
寸晷而何從悔弱齡而志俛兮神營營於天宇旣漸

陽山書堂集卷之一
達以振羽兮庶貽親以榮膺曷承歡以永日兮分劬
劬於稽古恐凡卉不足以奉

君兮願永言乎蘅杜莪若茲其爲蒿兮雖漑滋其焉補茲
哀羅織而莫舒兮忘縲縶之爲痛長伏苦以噓洩兮
血滯滯而腠膚邪攻首其如焚兮液潛鑠而內枯日
晚婉其就陰兮忽一體而神殊爭逸嗒以紛呶兮互
詬誅而攘掄宵軋軋以達曙兮旦晝始返乎其都是
何營衛之舛錯兮震余衷其足愕進盧氏而命診兮
劑既和而增劇援靈樞以示余兮指肌腠之所絡謂

官府各有攸司兮斷制謀慮之互爲橐鑰惟神明總
於太清兮斯悉稟命於冥漠心君旣憑眚以煩寃兮
厥屬失據而相薄閔戚固亦有宜兮繩墨因時而改
作願寧淡以澄神兮庶有喜而勿藥醫言其有旨兮
感余心而怛怛聊忍痛以尊生兮舍古訓其何仍哀
輟業固有常兮禮或無禁乎窮經掩涕而正襟兮重
搜爰象於窈冥泰之伏爲否兮雖天運其弗越惟勿
憂而日中兮固苞桑以無蹶貞或底於厲兮悔或免
而勿罰要守懼以終始兮雖顛躋其莫汨沒慎斯語

以祛痒兮更探索而旨長何時序之遷流兮又閱夏
而秋在望浮雲黶黶而莫廓兮滯潦汜濫其湯湯蠅
營營其晝擾兮暑蒸鬱而汗裳喪紀其一周兮徒囚
首而懷故鄉觸緒以興愴兮重闕咽而抑傷委吉凶
以任運兮永聖訓以自強固嘯歌之未能兮哀欲抒
而成章

西洋貢獅子賦

皇帝御極十有七載凝龍圖於黼座握鳳曆於璇宮覃雍
恬之文教昭赫濯之武功陸梁獻欵反側從風兩階
之干羽旣舞萬國之玉帛攸同乃有絕域之君西溟
之侶占澥澤之寧波望祥雲之干呂越梯航以叩關
搜神奇而入旅效疏勒之輸誠修月支之舊緒其爲
物也德亞足蟲之長威稱獸類之王萃西方之凝肅
秉金氣之堅強毓精申未之區蓄銳聚窟之鄉故形
爲萬靈之冠體逾百煉之剛齒巒岼而五兵失銳目

閃爍而雙電交光當其弭耳宛足糾筋束骨練眉不
飛金毫未揭雖猛氣之翕伏終奇形之窵兀鷗隼九
霄而羽折雞犬千里而聲歇及其舐唇焰灼建鬣鋒
懸利爪舒鈞修尾拖烟忽左睨以右盼乃顧後而昂
前壯夫爲之膽栗力士爲之心眩若夫銅首抵蕩鍬
額觸薄聲吼天關足撼地岳咆哮而霹靂轟鳴踐籍
而林叢隕籜裂虎豹於拳掌碎犀兕於齧齧潛蛟拔
井而雨飛巨象崩崖而血濩所以筋入響而絃絕拂
不揚而蠅落截途而魏師驚寫狀而林邑却叶夢兆

三台之尊入朝隸五坊之樂大食之獻頻飼於天厨
康居之珍草賦於祕閣良殊域之最奇洵神物之足
愕者也在昔軒轅東馭白澤來賓穆滿西巡俊貌遠
屈匪遠物之足誇亦徵聖化之無外矧今日神武大
播荒徼懷柔何分疆界旣已清薄海之車書自可圖
殊形於王會觀其俛受金縷俯入朱欄旣聽樂而率
舞亦仰德而來觀足徵不庭者之稽顙信政扈者之
革頑又觀其雄峙闕門凜伏彤鑾烏鳶懼竄狐兔摧
殘譬則司直立朝姦回志折元戎當闔逋寇心寒於

是

聖天子鑒旅獒之章慎越裳之貢重念臣妾之歸懷不貪
耳目之玩弄納獸圈以示優容錫南車而資賚送勤
德政以致騶虞宏網羅以收麟鳳行將澤被蠟生仁
敷蠕動天馬寧誇漢室之歌赤豹何羨韓侯之頌

絕交書

不孝學識庸陋稗年得謬通籍性復剛褊寡合不能
與俗俯仰老年兄以桑梓鉅望道貌冲和折節下交
每以遠大相許不孝亦不自量其督闇思托附驥尾
相與有成每探蹟析微窮極理性罔間晨夕自謂針
芥之投庶幾終始也豈意彝險易操初終殊態猜忤
其心險幻其術幾陷不孝喪身覆巢而不悔也嗚呼
痛哉不孝釋繫之日不勝憤懣號於司寇然粗述相
負大畧耳其於不可告人之隱猶未忍宣之於衆也

而老年兄怙終迷復善於飾非文過不稍自加咎省
竊恐不孝雖箝口結舌於絕域而鄉里憤悻朝紳公
論從此而起九臯聞

天或至對簿指摘則交誼瓦裂厚道陵替由後追昔豈不

愴然是用布其巔末鮮所忌諱惟老年兄平心靜氣

察之幸甚昔甲寅之變

不孝

遁迹僧寺逆黨刃脅老

父追尋不孝挺身往代刀鉞林立蹀屍踐血

不孝怙

不爲動見賊不跪語不爲屈以爲苟得全親一身死

不足恨耳逆怒將寘於刑已復放歸

不孝

卽削髮披

緇杜門旬日逆賊分曹授官不以相及自幸得免賊
臣教以遍加網羅防杜不測遂脅以僞官然不孝就
拘而往不受事而歸辭其印札不赴朝賀瘠形托病
三年一日此通國所共聞有心所共嘆不假不孝一
二談也年兄家居安溪在六百里之外萬山之中地
接上游舉族北奔非有關津之阻徜徉泉石未有微
檄之來顧乃翻然勃然忘廉耻之防徇貪冒之見輕
身杖策其心殆不可問而不孝以素所欽仰之心猶
曲爲解諒謂不過爲怯耳故六年叔初來不孝卽毅

然以大義相責令速歸勸阻又恐年叔不能堅辭不
 足動聽復遣使輔行而年兄已高巾褰袖見耿逆而
 來矣不孝方食駭懣投匕而起然思隻手回天孤立
 無輔舉目異類莫輸肺腑冀年兄至性未滅愚誠可
 感庶幾將伯之助故嚴詞切責怒髮上指聲與淚俱
 先慈恐不孝激烈難堪遣人呼入家嚴出以婉詞相
 諷至自述老朽布衣受封已甘與兒輩闔門共斃年
 兄亦為改容家嚴乃呼不孝出與年兄共議促膝三
 日凡耿逆之狂悖逆帥之庸闇與夫虛實之形間諜

之計聚米畫灰靡不備悉

不孝又謂以

皇上聰明神武天道助順諸逆行次第削平矧小醜區區

運之掌股者哉年兄猶以爲落落難合及

不孝引楊

道聲與年兄抵足一夕年兄旣溪服其才且見其勝

國衣冠之遺猶有不屑與賊共事之意始信前言

不

孝於是定計

不孝

身在虎穴當結楊道聲以潰其腹

心離耿繼美以隙其羽翼陰合死士以待不時之應

年兄遁跡溪山間道通信歷陳賊勢之空虛與

不孝

報稱之實蹟庶幾稍慰

至尊南顧之憂年兄猶慮既行之後逆賊有意外之誅求

欲受一廣文以歸

不孝

謂不得一縈身事外之人軍

前不足以取信若後有徵召當堅以病辭萬一賊疑
怒至發兵拘捕吾寧扶病而出以全家八口爲保年
兄始慨任其事臨行之日不孝訣曰他日幸見天日
我之功成則白爾之節爾之節顯則述我之功倘時
命相左鬱鬱抱恨以終後死者當筆之於書使天下

後世知

國家養士三十餘年海濱萬里外猶有一二孤臣死且

不朽嗚呼當此之時

不孝

揚眉怒目隕涕歔歔天地

爲之含愁鬼神爲之動色凡有血氣聞之當無不扼腕酸心捐軀赴義者嗚呼息壤在彼而忍忘之乎年兄旣行耿鄭構兵音耗莫通不孝兩次遣人出關終不得達意年兄當已代陳

天聽

而年兄猶豫却顧及至耿逆敗衄聞招撫之令始遣

紀綱抵省謂

不孝

能勸諭歸誠乞與其名噫嘻

不孝

托病拒逆何由進帷幄之言年兄身在臬郡何由預勸降之策其爲術豈不疎乎然不孝所喜者年兄已

乃心

王室意在見功事篋不濟而彼時耿逆猜忌方深城析嚴
密片紙隻字不能相通且紀綱頗稱解事可宣心腹
因備告以耿逆勢未窮蹙不肯歸誠今幸耿繼美已
被離間出鎮浦城內生疑端海賊雖已連和彼此未
忌瑕釁不若各散流言使二逆相圖以分兵勢一面
遣人由山路迎請大兵道由杉關一鼓可下若臨城
不順則內應在我反覆叮嚀兩日遣歸蓋自張誥回
後不孝方幸年兄之克有成功而不虞其萬一相負

也親王入境年兄抵省相見乃詭言謂爾時假道汀
州恐爲耿氏捉獲則我可幸全爾立蓋粉矣今幸全
見天日爾報

國之事非一吾當一一入告爾俟吾奏聞之後然後進

都又作詩相贈不諱省中誓約之言美不孝反周爲

唐之功不孝亦遂安心以待豈疑有護短貪功之意

乎丁巳之秋與年兄束裝赴闕而年兄以聞訃歸不

孝見年兄方寸已亂不復與商遂以戊午之春入都

請罪蓋亦自信三年心迹輿論共嗟不必待人而白

初不料道路阻隔之先京師之訛言百出也及到始知以陳昉姓名之故誤指不孝曾爲僞學士殊爲駭然而銓部無據呈代題之例吾鄉撫軍又易新任於是遣人具呈歸家蓋將以具疏可否請於撫軍然後詣

闕席藁在都僦邸閉戶公卿大臣未通一刺一二師友

通問不孝一語不及年兄今從前在都諸公歷歷可

問耳不孝家人歸時值年兄以通道迎請將軍事聞

上重念年兄從前請兵之勞溫綸載錫晉秩學士親王亦

信年兄昔日之節親屬子弟皆借軍功給札委官昆
從顯榮僮僕焜耀是不孝無功於國家而所造於年
兄者豈鮮淺哉夫酌清泉者必惜其源蔭巨枝者必
護其根年兄當此清夜自省宜何如報德也乃功高
不賞但思抑不孝以掩其往事之愆時家嚴以撫軍
在泉遣使具呈請咨到京而年兄竟留其呈詞不令
投致巧延家人三月不遣又恐同人別爲介紹貽書
巧說阻其先容不孝在都半載不聞音耗五千里遠
道徬徨南歸嗚呼年兄竟用心至此耶所幸者寧海

將軍駐師泉郡時或誤傳不孝入都道斃者泉之人
士扼腕嗟嘆囂然謂學士辭僞請兵實由陳某今不
爲代白使鬱鬱資恨而死天道寧可復問語聞將軍
詢於年叔而年叔亦抱不平之憤慷慨爲述始末遂
使不孝數載不發之隱衷一旦暴於年兄家庭之口
斯蓋冥冥之中哀愚忠之被抑忌涼薄之滿盈天牖
其衷非人力所能損益也不孝抵家將軍招至軍前
恩禮有加罔測其故尚意爲年兄揄揚之過戴德不
遑而年兄抵郡不思事由公論所致但疑不孝洩其

語於將軍陽爲具揭代白而於吳都統及內閣覺公之前陰行誹謗二公竊笑而已及至具揭之日將軍都統面詰年兄之負心年兄慚惶引咎自許入都代陳不孝見揭帖不盡隱諱心猶信之及覺公語以將軍得聞始末之由且述年兄向渠極言不孝入都托足無門至爲師友所厭皆勸令南歸而泉之人士皆謂將軍已悉其詳故年兄不敢諱其具揭實非本心不過畱不孝軍前以阻入都之路者不孝聞之惘然驚惋不食積日蓋自是始知年兄用心之險然未敢

盡以爲信也 不孝疏上奉

嚴旨年兄入都遂趨趨囁嚅竟負將軍都統面約之言及

徐弘弼狀下於理 不孝繕疏自明年兄排闥直入力

阻後潛具密疏草率了事而 不孝已逮西曹矣年兄

疏上益都駭嘆謂陳某苦心至此而厚菴前乃語我

陳某十七年入都爲耿逆探聽消息前後何刺謬耶

不孝聞之舉以相質年兄巧於回護謂益都高年聽

聞之誤不孝心雖疑之然事非情理所堪猶願其或

不出此也 不孝旣坐繫廷訊在卽年兄慰勞堅稱徐

弘弼所告赦後謀叛原與不孝無涉樞部因疏內有
名一槩混拘不由

上意一訊卽釋不必多言指天誓日厚貌深文足以動人

聽信不孝智昏神昧始終受欺對鞠之日指斥逆黨

而赦後之事置不與爭又思寧人負我毋我負人事

旣得白年兄行藏不肯一述於衆聽一念堅忍竟陷

不測之罪嗚呼痛哉不孝三載千辛百折寢食不寧

使其鵠蚌相持腹心內潰孫武之死間直以八口之

性命殉之卒之王師入境由海寇掣肘於後耿繼美

陽山書堂集卷之一
納欵於前萬里孤臣未嘗無藉手以報

聖明萬一然先事未達於

宸聰使血誠一無可據而梓里傳聞皆知不孝外示病羸
陰約內應諸逆震駭怒目劓牙卒受其先發制人之
毒事有固然又何怪乎使年兄不受約於先則不孝
當別遣人通信不許代白於後則不孝當早進京自
明徐弘弼誣告之言何自至哉即使其初相誤非出
有心使不孝對鞫之時知徐弘弼以赦後事誣告則
親王入境不孝曾啓陳諸逆帥觀望可疑宜加防備

逆賊水師戰船宜早收羅徐弘弼所告在十六年之
後不孝具啓在十五年之冬舉此一端足破其妄何
俟指陳纖悉以累朋友之清節高名乎爰書既定朝
野有心莫不憤嘆年兄不自咎悔對人反責不孝以
十四年紀綱到省不與回書且責不孝以不死以自
明其易地必死也嗚呼捐軀致命唯事後始可相信
安有責人以死而人遂信其能死者乎姑無論六百
里望風委贄能死與否人臣當萬死一生之際一飯
不食君用間出奇忘身冒險天地鬼神共臨共鑒亦

安在其必死也至於紀綱回郡未有回書三日促膝
之談何事不悉耶凡人交際瑣屑尚不肯盡形筆墨
不孝所約何等事也敢宣尺牘乎年兄片紙相投亦
不過寒溫數語其勸諭耿逆之言亦自口致假設不
孝裁答其肯綮亦不敢筆之於書負心者出以示人
是請兵一事與不孝渺不相關之確據也自不孝定
案之後洊歷寒暑年兄遂無一介復通音問其視不
孝不啻握粟呼雞檻羊哺虎旣入坑穽不獨心意不
屬抑且舞蹈漸形蓋從前牢籠排擠之大力深心至

是而高枕矣及六年叔入都親臨慰視激烈抵掌欲
叫

關代請而年兄堅謂事已得釋若重瀆

聖聽恐反滋疑事脫有不測吾焉肯相負遂使年叔不敢
輕爲舉措揮淚而別今歲之春聞

上問者至再矣諸王大臣未見密疏何所容議然奏請者
有人援引釋放之例者有人年兄此時身近綸扉縮
頸屏息噤不出一語遂使

聖主高厚之恩僅就免死減等之例使不孝身淪廝養迹

遠邊庭老母見背不能奔喪老父倚閭不能歸養而
此時年兄晏然擁從鳴騶高談濶步未知對子弟何
以爲辭見僕妾何以爲容坐立起臥俯仰自念果何
以爲心耶夫忝德不酬視危不救鄙士類然無足深
責乃若悔從前之妄護已往之尤忌共事之分功肆
下石以滅口君子可逝不可陷其誰能堪此也獨不
思當日往返衆目共瞻今不惜輿論之是非但思抑
一人以塞漏遂至巧言以阻寮友而不計人議已之
薄造端以欺師相而不慮人疑已之誣陽爲陰排於

大帥之前而不思人惡我之反覆掩耳盜鈴畏影却
走平日讀書何事談理何功豈非所謂目察秋毫而
不見其睫者耶嗚呼年兄至是已矣知人實難擇交
匪易張陳凶終蕭朱隙末讀書論世謂其名利相軋
苟一能甘心遜讓何至有初鮮終豈知一意包容甘
心污斥而以德爲怨禍至此極向使與年兄非同年
同里同官議論不相投性情不相信未必決裂至此
迴思十載襟期恍如一夢人生不幸寧有是哉 不孝
將顛疏呼寃則非臣子思過之義將昌言示衆則非

絕交不出惡聲之仁誠恐回適畢露掩覆末由悔吝
孔多噬臍將及每追昔日晨夕過從之歡覽張陳蕭
朱之戒可爲於邑是以陳書謝絕兼布腹心或者年
兄戒迷復之凶敦報德之義遡泉蔭之本源悔下石
之機智補牘詳陳無所隱諱免冠引咎積誠動天

聖主必嘉其遜讓朝野亦頌其義聲失之東隅收之桑榆

則改過不吝有光古人不孝雖已割席敢不拜在下
風以承嘉譽承惠資斧已藉鄭肇老先生代璧執鞭
之暇聊致區區西向揮涕不知所云

李葆甫傳

李葆甫先生名日燦閩泉之安溪人也少卓犖不羣
總角能文頃刻千言矯矯有奇氣郡士大夫咸器重
之以諸生高等明經入太學先生學根抵六經而文
章出入史漢議論英闢迥出人意表性好施然諾必
果自是都人士莫不知有李葆甫先生也先生狀貌
魁岍奇偉氣度深沉負大畧其爲諸生時值明季天
下多事乃益探孫吳陰符之祕思得一當與人談及
時事則喟然太息忼慨有國士風里中有執政家居

者先生條上便宜十餘事皆中當世切務執政者心異之而時事已不可爲矣

國朝定鼎閩以海濱輯寧未幾而永春德化諸縣篁谷溪險萑苻嘯聚掠居人以要重賂有司莫之禁也先生有弟及弟婦暨從子十餘人俱陷賊中先生天性孝友竟身詣賊壘陳禍福賊大感動將釋之適有阻者遂不果先生亦竟得脫歸乃悉捐家貲號召三縣子弟謂之曰葆甫弟困於賊待救之日久矣吾義不與賊俱生孰能與我同仇者乎里人感其誠咸附焉得

數千人時賊據險立營備甚嚴難卒取也先生偵知
山後峭壁千尋防禦稍疎乃募樵採十餘人夜半緣
崖先登餘衆蟻附而上截竹爲戚策吹之呼聲動天
地值大氛霧咫尺不辨色賊出不意驚駭奔觸輒殲
之賊棄營宵遁乃乘勢追奔逐北前後設奇出險凡
攻戰五閱月屢以百十人破其黨數千衆賊窮促請
降諸子弟後先得出三縣悉定有司上其功將大用
賊黨以他事擠之竟弗錄先生夷然弗屑也蓋先生
以書生數月而平巨寇蹟最奇婦人走卒皆能道其

事太學期滿得郡倅棄弗就優游田園課子弟讀書
其視世之因時會以取功名者固不以介介也今先
生年六十餘而意氣矍鑠論事磊落超特不減少壯
至胸次瀟灑則若充然有得者蓋先生之神明遠矣
論曰李葆甫先生固當世所共稱豪傑士也然世多
奇其破賊一事乃以不大用於時設施未竟爲先生
憾其知先生者已淺矣夫所謂豪傑之士者其用意
深遠初不必盡令人知之其抱負所存亦不求當世
共見之也至於天性所觸義勇奮發亦取懷予之假

由此而握金虎符封侯萬里外而寧有加焉昔師尚
父年八十始秉鉞建旄當其垂綸渭濱鴻鵠未舉神
龍不雲寧遂無以自異哉然此可爲知者道未可與
拘瑣齷齪之士同日語也至夫栖遲泉石樂其天真
較世之執圭膺組而俯仰趨趨者世必有能辨之又
奚俟予言

解介士傳

解敖者吳人也其先狼蠃妻曰博帶夫婦佐禹治水
導江入海有功帝念其勞使主江淮南海之祀而納
藁秸焉周太伯入吳其子孫有牟氏實佐之族益蕃
支庶食采於解遂別爲解氏自解狐解揚顯於晉族
實聚於吳至敖而始大敖少以武勇聞好被介擁劍
橫行江淮其族人散處田間率不事力穡伺歲熟率
其宗刈鄉人穀盡歛致於敖以故吳稻無遺種焉鄉
人苦之會吳王夫差將修怨於越下令國中募介士

無應者夜夢蒼衣丈夫介而受爨入王宮寤而悸召太史筮之得離之解端策而賀曰他日之獲非麟非鳳非鱗非翔黃中而負筐玉質而金相於象爲離於姓爲商曰充蒸嘗吳其爲諸侯之強乎無何國中有以敖名聞者吳王使延致之敖恃險竄草澤不出其族人爲毒益甚捕之急弗得王念伍員者故蘆中人也使將兵以往員曰吾聞敖勁而銳然無腸可智取也選壯士伏大澤中夜縱火敖果率衆譟而出悉擒之加束縛獻俘於王王使太宰嚭詰其狀敖怒目前

曰王今所早朝而晏罷者非越乎顧越如敖輩且百
數種蠡二豪在焉王其圖之臣請以子弟千餘自江
浮海箝制其後庶可以得志敖應對不屈咳吐皆珠
璣吳王大奇之使太宰解其縛饗於章華之宮自是
嘗被介侍左右其宗人率水軍浮海一如其策卒破
越強吳者敖力也敖外剛內柔與人交剖心出肺腑
相示久不厭自吳王後宮太宰以下士大夫國人皆
器重之爲王宣德意膏澤必下究焉然性躁而多言
且自負其先世以爲在豕韋氏之上又嘗慕衛史魚

晉羊舌氏之風太宰嘗抑之敖不能平請與論功曰
王有事於越敖子弟出死力負芘披葦入海望潮撥
棹蒙虎皮以冒鋒鏑稚弱皆勞於王事子孰與我太
宰曰唯唯敖曰王盟於黃池吾拓地東達淮泗西至
豫章九江數千里使七十二諸侯皆有聞焉子孰與
我太宰曰唯唯敖曰王與西子宴于姑蘇屏諸大夫
獨敖與執火者侍王沉酣達旦敖每節焉子孰與我
太宰曰唯唯敖曰三者皆吾下而嘗吾抑何也太宰
曰方子見縛王實使我雜治焉子雖赤心微我安得

進敖不應然心惡其專每動作微箝制之自是太宰
欲害敖無虛日矣敖侍王久與左右益狎微有所中
傷太宰乃讒於王曰敖悍而兵利身不可近也昔管
仲相齊以鹽筴霸微敖莫可事此者乃邑之海鹽三
百戶敖謂其屬曰王信讒而厭剛吾恐麋鹿復遊於
姑蘇矣速營糟丘吾將老焉自是緘默不復言竟老
於海鹽越滅吳其子孫或改爲彭氏漢興彭玉佐高
祖有功以叛菹醢其族多散於江淮南海尤盛云
太史公曰余與欒生遊欒生爲余言其祖布爲彭王

客時王嘗述其先世如此敖將卒謂諸子曰吾族起
田間以介士見知於王公士大夫於願足矣吾子孫
或恃武弄兵以橫行天下吾恐若敖氏之不血食也
至彭王果應其言可不謂智哉使彭王守先業勿替
臣節膏流天壤當與借箸分肉之功爭烈竟以肆毒
自醢其宗悲夫

送官子之蓋州序

聖天子崇儒重道文教覃敷從龍貴胄人詩書而戶絃誦
盛京以豐岐重地文治煥然一新壬戌之秋余以謠詠

蒙

恩貸得謫瀋陽瀋諸公卿子弟願執經問字者接踵寢
後乃得晤官子官子三謁余不獲比晤則相叩以正
誼明道之學若不屑世俗紛華功利之爲者余爲一
慰嗣余設塾官子從余授一經早夜不輟執禮必恭
與語輒領悟析疑問難或發余所未及者余意官子

能相與以有成也越明年而官子以資從鎮將榷稅
蓋州蓋荒瘠濱海之區而隸樞部從事者遷轉較他
曹稍壅人多規避不肯爲或得則戚戚官子不以動
乎其中惟以稍違其親兼不得就學爲憾旬日乃詳
訪其風俗利弊鰓鰓以米鹽凌雜股商罷民之是懼
推斯志也庶幾恤民依而知本計者歟程子曰爲民
寬一分則民受一分之福官子當有道以處此也抑
吾聞君子於將行也贈以言蓋固濱海地也海之爲
德坎而能下窈乎深以有容其源遠流長渾涵洋溢

而無溪澗湍激漂瀑之態故能翕陰吐陽沐日浴月
殊珍詭錯繁夥充牣其中而爲利於天下最大吾願
官子之觀於海也欲然以自牧淵然其能受從容漸
漬盈科後進而勿以矜炫淺迫爲事由此而他日爲
國家任大事決大疑勲在社稷澤在民生而不自以
爲已有庶無負正誼明道之初心爲國家多才之慶
乎吾知官子之終能相與以有成也於其別序以送
之

丁巳秋道山募建曾度疏

昔先王建皇極以蒞萬方化功侔於天地握乾符以臨六合厚澤覃及幽明故河清海宴神人無雜擾之災物阜民蕃太史奏休徵之應叔季王風旣降聖教莫修忠孝情衰廉耻道喪招刑罹禍好殺貪兵遂有醉生夢死墮異趣於冥途枉命非辜抱怨愆於泉壤良由釁孽自作以致業感相因釋氏乃演空妙之微言闡慈悲之奧義大聚僧伽廣宣接引使長往幽魂悟真空而

解脫含冤滯魄識業報而依皈此曾度無遮大會所由起也我

國家重熙累洽之餘固已宵旰不驚邊烽無警我
皇上聰明神聖之主又已禎祥畢集仁壽可登矣慨
自釁起滇黔禍連閩海夜郎自大井底稱雄倚
篁谷而負嵎指潢池爲犄角幽囚節鎮長閔日
星刼制縉紳恣威刀俎統絀未分菽粟謬誇虓
虎飛熊子衿久廢詩書妄擬攀龍附鳳橫征彘
稅閭閻之杼柚其空計口核丁婦子之髓脂俱

竭乃從山鬼乞靈致祭遣官恨不借五丁而開
金穴尚有土膏未竭淘沙破壁庶幾入九地以
備火攻唾前賢鑄山智拙輪周廓好何如當百
當千謂古人煮海術疎設引通商未若官收官
市迫蒼頭以從軍朝入伍而暮衝鋒何殊畫虎
勒富民而索餉旦拘縲而夕帶組寧異沐猴志
士方破涕爲笑私喜見天可期叛帥竟背

君念親早已望風獻欵遂乃憑凌東浙震撼西江逮
夫虎旅遙臨猶且鳴張肆虐連烽列郡苦戰三

年誰無祖宗墳墓之思春露秋霜壠上孰澆斗
酒孰無子母夫妻之眷天涯海角夢中但憶音
容甲冑半生蟣虱聞砧泣向秋風故園遙隔關
山聽笛心傷夜月秣馬枕戈本期馘巨憝於軍
門何意陷鎬嬰鋒半是海濱赤子雲屯席卷兼
擬靖鯨鯢於鮫穴可憐此離瑣尾大都內地殘
黎空山寒白骨烟霧晝昏落月照青燐悲風夜
嘯千里丘墟冷突孤村無犬吠萬家荆棘短墻
溪巷有烏啼此仁人孝子共爲酸辛

后土皇天同加震怒者也禍盈業滿否極陽回大旅
入關降王繫組劉盆子待以不死光武已稱寬
仁尉佗王重賜璽書

聖朝允隆曠典我親王宥敷德意擬曹武惠之下江
南諸大帥仰體

皇仁同裴相公之平淮蔡雲霓在望海溼歡騰天日
重光神人喜溢然率土咸慶更生難慰孤魂於
長夜草木亦沾

聖化更添幽恨於重泉

關山書堂集卷之一
國家褒揚忠節亦足酬死事之英靈恨未執仇人
而搵刃

恩詔清還流口幸已聚生全之骨肉痛難噓枯朽以
回春尚有剝髓敲肌慘終桎梏或典妻鬻子身
殞羈囚捐軀裹革壯士化碧形銷矢節投緋紅
粉傷心淚盡或骨轆黃沙而魚鴈杳沉尚入香
閨之夢或神栖異地而香芻哭奠難招遠道之
魂九原非舍天陰雨濕聲啾啾重壤無家草短
日寒雲漠漠昔孝婦含冤尚阻三年之雨忠臣

被謫猶飛六月之霜矧茲厲氣上干恐致疵癘
爲虐道山西意大師目斷南國之烽烟心痛秋
原之鬼哭乃廣

聖主澤及枯骨之惠闡我

佛超拔人鬼之因爰以七月中元修舉會度大會
丐余一言曾通善信痛余甫辭京闕旋陷網羅
白髮在堂奚忍毀巢破卵丹衷未泯寧甘屈節
事人蠟書遣使道阻重關逆命加身固辭不獲
自慚托病如憤如聾

天綱重振已甘身正典刑

聖德實弘尚許偷生溝瀆昔日呼牛則牛呼馬則馬
祇是存方寸以對

天地鬼神今日生我

國恩死我

國法尚可瀝生平以對

君親師友讀書濟世始願已虧蒙耻救民此心猶在
痛死難之諸臣實愧忠魂於地下傷無辜之黔
首願會佛力於冥途其在仁人君子或荐拔其

先世弘水源木本之思或造福於幽都廣埋骨
掩骼之德伊蒲助供善滿人天瓔珞施捐恩及
異類庶神人之怨恫俱消太和積爲豐登之慶
萬劫之沉淪悉度兵氣銷爲日月之光矣謹疏

告都城隍文

康熙十有九年歲次庚申閏七月朔福建福州
府候官縣地方原任翰林院編修陳夢雷謹薰
沐虔誠昭告於

勅封都城隍正神

伏以

天聽無私妙感應以立善淫之勸

神威有赫顯昭格以大彰瘡之權全忠之與盡孝事
有同揆交友之與事君理無二致惟隱微之罔

愧斯幽顯之式臨痛

雷

稚年登第謬廁清班請

假送親慘遭逆變僧舍孤棲對高堂而灑淚朝

衣九叩望

北闕以銷魂暫擬徐元直之全親實志狄梁公之報
國然重圍苦難脫屣隻手痛莫回天李日烜初到曾
聲大義以阻其來李光地親臨許保全家以堅
其往結同心以離逆黨授密策以逐

王師臨食必嘆一飯不忌吾

君不寐長嗟有夢尚遊故國龔勝之餓軀僅續王維

之病骨堪憐何意李光地蠟書遣使負約於先
寵命加身爽信於後致雷有懷莫剖負謗難明昔孝
婦蒙冤尚阻三年之雨忠臣被譖曾飛六月之
霜衾影苟或無慚

昊蒼或蒙昭鑒是用陳茲孤憤述彼負心未忍布之
朝紳先冀聞於

神聽伏惟

勅封都城隍正神既能

節陰宣陽佐洪鈞於宇宙必當

扶忠褫倭植正氣於乾坤如雷言詞或誑乞加霹

靄嚴誅如李光地始終負心尤望

神祇默鑒或陰牖其衷俾微誠代通於

帝聽或顯示之應令孤忠得白於

朝廷非惟彰瘡無私抑且善濞有勸嗚呼痛友誼之

不終古風掃地望

君門而獨遠血淚呼

天激切鳴冤虔誠上控謹疏

爲心月上人書紙

佛告阿難如人以手指月示人此人因指當復看月
若復觀指此人豈惟亾失月輪亦亾其指又告文殊
但一月真中間自無是月非月佛言如是今我上人
號爲心月世人觀者莫於心外別求月體莫於月外
別作心相月有圓缺此月不因有圓缺故增減月性
心有動靜此心不緣有動靜故生滅妙心卽心是月
卽月是心心外無塵月外無影山河大地成空明相
是名心月我言心月於佛所言義離合不上人垂慈

閑止書堂集鈔卷二

候官陳夢雷省齋氏著

施奇文介平

羅擢錦元邵

同里陳發曾世承校閱

許遇月溪

施琰又韓

詩

擬古十九首

有序

蓋聞陳思才誇繡虎規七發以咀華江郎筆艷奇
葩綜百家而擬製鮑明遠代新詞於樂府班孟堅
演舊體於連珠皆想逸風雲情閑翰墨故能移宮
變羽廣陵復睹遺音異曲同工白雪不爲孤響者
也若夫舒幽寄惋促節煩聲複綜其詞乖迂其旨
義雖始於三百篇調實新於十九首彼其古柏白
楊痛甚於湘蘭沉芷黃姑織女望溪於北斗南箕
遊仙異郭氏之虛真飲酒豈阮生之晦跡泣鬼神
於長夜飛霜雪於毫端所以冠冕五言權輿百代

寄遠懷人資其香艸閨情古意掉彼波瀾他若陸
平原倒海雄思韋應物焚香清典間或模範未睹
超羣豈顰工絕世苧蘿獨標窮巷之姿抑情戚由
中雍門難作無心之泣歟嗚呼姓名隱矣懸隔日
星陵谷遷歟鏤貞金石遂使寡鵠羈雌聞聲愴類
孤臣怨客觸緒銷魂飛將軍冠髮指天數奇何恨
李少卿刀環委地一當難言子形凝碧何辭碎樂
器以捐軀備隊後軍自可呼敗師而脫足所痛者
王陵身非漢地郝曾責異專城哀趙苞之八口事

難遂於龔生病摩詰之三年恨不殊於崔篆覆巢
寧惜方寸奚堪填海徒勞虞淵無路望藤蕪而不
見指河水以爲盟西江汲遠神傷涸轍之魚北極
雲溪夢斷上林之雁蠟書旣阻恨賦徒然未暇庾
信之哀江南且共屈原之悲往日膏沐誰容何暇
鏤金錯采朽苴恨晚寧云扈雅揚風旣愴河山之
殊不禁邯鄲之步但惜迴文錦就誰迎蘇蕙之車
縱使遊學踪還難甦紫玉之魄歌以當哭留碧血
於他年古直作今續騷魂於往代云爾

行行重行行

高樹動悲風，行子怨離別。
握手訂歸期，與君未永訣。
浮雲蔽白日，光景倏明滅。
關河阻重深，寒威多雨雪。
欲濟無津梁，吞聲自哽咽。
歲月已悠悠，懼君不我屑。
飛雁逐風翔，行轅有還轍。
努力強加餐，相期奚忍絕。

青青河畔艸

離離萬丈松，青青兔絲艸。
兔絲附長松，托根自美好。
結髮與君知，相要以終老。
何堪一分手，棄置在遠道。
遠道自相違，非君不我寶。
中夜常涕零，憂思不可掃。

相見應有期安得辭枯槁

青青陵上柏

嶙嶙澗底石鬱鬱振喬柯枝幹上干雲結蓋自婆娑
巍巍新宮闕百雉聳嵯峨甲第亘長虹擁節復鳴珂
金張連羽蓋許史互經過繡轂錯朱輪夾道擁笙歌
來日常苦短去日常苦多得志在一朝不樂復如何

今日良宴會

佳會再難遇置酒在高堂翩翩貴游子列坐飛瓊觴
天天桃李姿顧盼生容光清歌發皓齒妙節協笙簧

同心諧所願慷慨殊未央人生貴適志戚戚何所妨
行樂當及時此意未可忘

西北有高樓

青樓當大道高入浮雲端繡戶間朱扉翠幙玉闌干
樓上有佳人長笑氣若蘭援琴發清商苦調寡所歡
飛鳥不忍鳴行道爲辛酸曲終悲未竟對案不能餐
胡爲自局促矢志各有難知音良未易中夜獨永嘆

涉江採芙蓉

叢桂南山岡隨風香自遠採之遺所思白日忽已晚

道路阻且長常恐芳馨損桂樹多苦心素交恃真悃
江湖行路難驅車仍復返

明月皎夜光

涼風掃庭柯玉露紛已盈秋月自揚輝河漢亘空明
洞房枕席冷寒蛩向我鳴念我同心友憂思常苦并
金石豈不固寒暑移爾情憶昔握手歡恩愛若同生
願君貞初志努力全令名

冉冉孤生竹

幽蘭在空谷馥馥吐奇芳宜爲君子佩柰何棄路傍

良人遠行役各在天一方道遠不可致採取將何望
秋風動地起百艸委嚴霜馨香難久恃引領情內傷
庭中有奇樹

嚴冬陰氣肅寒風鳴樹枝庭前有丹橘朱實何離離
傲然霜雪中獨秀見奇姿偏疑地氣暖造化不無私
珍重襲藏之聊以慰所思

迢迢牽牛星

秋至夜何長憂來孰與語攬衣步空庭搔首徒延佇
牽牛處河東河西閑織女雲漢爛清光佳期渺何許

陽山書堂集金 卷之二
永夜遙相望誰云應共處引領東方明心煩無復緒

迴車駕言邁

步出東門外古塚荒草驕殘碣臥青苔松風自蕭蕭
幽室闇無光遊魂不可招疇昔強盛時結駟復聯鑣
流光如電摧潛寐不復朝壯志無有極形化終寂寥
哀彼勞勞人長使我心恟

去者日以疎

死骨日已朽壯顏日以醜造化爲洪爐萬物爲芻狗
百年同一瞬豈復論先後自非金石堅安得言悠久

達士貴長生形神自相守冥心歸太虛天地與同壽
遺世如浮烟得失復何有

生年不滿百

神仙不可學羽化無留形乘風遊太虛此事終杳冥
藏精營丹鼎蒼鬢忽已星吾聞飲美酒可以制頽齡
永日恣揮觴沉醉勿復醒

凜凜歲云暮

驚風起四郊陽光將西匿雨雪紛霏霏思君何惻惻
德音已相違夢想見容色潔膳進盤飧願君強飲食

陳說苦別難君爲我太息雞聲入我夢一寤何由得
涕泗下滂沱憂思不可極啼鳥中夜飛恨我無羽翼

孟冬寒氣至

嚴冬變氣候寒威何凜冽嘆息念征夫無事久離別
惜別君有贈素絲皎如雪絲棼猶可治素質不可涅
幸無塵垢汗斑斑淚如血起坐擁重衾挽作同心結
願言藏懷袖藉此明高節

客自遠方來

客自遠方來遺我連城璧願我以貞堅勗我以清白

疇昔與君知抗言談在昔陰陽有代謝情性弗可易
山川終險艱與君成阻隔此言猶在耳此志寧有斲
爲我謝故人我心終匪石

明月何皎皎

明月何皎皎虛室延清光長嘆至雞鳴獨起心徬徨
天狼耀其精弧矢不敢張河漢已西逝北斗忽低昂
愁思不可極涕泗沾衣裳引領天已曙佇立望穹蒼

西郊雜咏

歲乙卯季冬爲先曾祖營葬於西郊歲云暮矣苦

雨淒風荒墳蔓草觸事興懷遂多感慨湧筆成章
無復倫次昔阮籍詠懷淵明飲酒寄情遐遠詞旨
超邁何敢追踪昔賢亦各抒情愫已爾

驅車西郭外極目碧天際寒日慘無光朔風何凜厲
百艸委嚴霜枯樹徒紛翳返睠南山岡挺生有叢桂
孤芳獨未歇凌空自搖曳策杖往幽尋心傷遂掩袂

其二

薄暮山氣佳夕陽含清暉緩步尋幽勝悞入荆棘圍
餘光闇將夕零露沾我衣夜深月影黑道遠不得歸

安得凌風翼奮翅起高飛

其三

嚴冬多陰雲微雨時蕩滌愁人當永夜但聞聲滴瀝
展轉不能寐靜坐憶所歷珠玉在塵埃何必非瓦礫
俯仰念物化萬慮此俱寂

其四

重陰閉已極朔風慘怒號灌木鬱參天連根爲拔倒
神龍久藏蟄老蛟逞威暴魍魎羣跳躍狐狸相叫噪
擁衾不敢寐中心傷且悼

其五

霜氣挾寒威，瀾湧遍阡陌。晨起望近郊，茫茫千頃白。
沉陰多肅殺，摧氣搖松柏。貞心耐寒歲，造化不能易。
陽輝昇景耀，蒼翠加潤澤。

其六

微雨喜初霽，酒酣江復清。散髮山之阿，遠聽棹歌聲。
晚風吹我袖，策杖返柴荆。我生已如此，豈復圖令名。
養拙安貧賤，聊復稱我情。

其七

幽靜愛山居近村亦易足寒月富桑麻酒酣歌相續
國賦早輸辦不受公庭辱徵求縱煩苛遠道難拘束
閑憇大樹陰臥看牛抵觸

其八

晨興四顧望列塚何崔嵬殘碑沉蔓艸石几臥青苔
昔時閩越王宮闕列高臺今日重泉下玉櫛化寒灰
貴賤同丘壠豪強安在哉逐逐今世人悠悠使我哀

其九

灌木動悲風殘雲迷孤嶼荒塚竄荆榛野魂應獨處

狐兔臥高岡穴中多蒼鼠寒雨滴空山石人相對語
人生寄一世奄忽如逆旅念彼平生時亦復多儔侶
感此情愴悽憂來無復緒

其十

晝歡常苦短夜愁常苦長披衣出戶視列宿紛成行
爛爛天狼光誰云弧矢張南箕北有斗終古永相望
天道已如此我思何茫茫感憤不能寐涕下沾衣裳

其十一

村舍雞再鳴農人知天曙驅車返室廬老親多問語

郭外多風霜念爾獨恒處勞倦更苦飢酒肉多厭飫
一飯甫終畢束裝仍復去子行未寸步親心千萬慮
回首意遲遲欲行未忍遽

其十二

明月皎夜光憂來孰與伍良友不在茲念之情如懣
西園千樹梅含芳多未吐伊人當此夜唧觴不可數
烟樹隔沉冥蒼茫杳難覩縱知相憶心寧識相憶苦

其十三

北溟有鯢魚揚鬣三千里隨風逐洪波一朝東南徙

陽山書堂集金卷之二
震蕩撼九天地軸爲崩圯陷身入污泥不若鯁與鯉
何如養神威潛伏淵潭底

其十四

鴻鵠羣南飛千里共盤桓望林俱投栖各自適所安
其一爲雌伏憂患不可干弋人方見逐聳翮入雲端
一羈網羅中臨風思振翰樊籠不可騁且復自摧殘
悠悠行路人掩涕以相看

其十五

代馬涉流沙東西萬里行中道一失羣窅若喪其精

牧圉加羈繼玉勒飾繁纓伏櫪不忍食北風常悲鳴
中夜長呼嘯駑駘皆震驚何當臨故道飛鞚越重城
摧鋒陷堅敵寧論死與生

其十六

我昔探幽勝足跡遍名山仙人乘白鶴引我入雲間
絳節夾青幢鳴珂愉且閑容華煥神光顧盼多令顏
飲我紫芝漿授我白玉環天上不可極人間任往還
一自隔雲霄蒼茫不可攀引領願多違滄下空潺湲

其十七

入山採靈藥山中多芳艸採之遺所思悠悠在遠道
道遠難同心懼君不我寶人非金石固豈得長壽考
蓄志苦難伸歲月忽已老飲酒聊悲歌且復寬懷抱

其十八

大樂不可復遺器在古琴吳叟得其真授我清虛吟
調高識更寡城市孰賞音抱琴山之阿撫絃感我心
一彈再三奏悲風動遠林巖巖青山高蕩蕩江水深
曲終歸至靜元化渺難尋

其十九

行年二十五衰病日見親達人觀元化屏慮以全真
任運寡所營胡乃勞其神心跡不相從我思難具陳
昔人甘疾首此意良苦辛

其二十

二儀更迭運河漢昇復傾陽光時隱耀陰魄有虧盈
至人洞化機憂思復何營易卦有明彛蒙難尚堅貞
天道不可問所貴在精誠

寄答李厚庵百韻

鴻鵠矯青冥咫尺視八荒鍛羽嬰量學物理不可量

我昔少年日忼慨多激昂讀史嗤少卿族殞名亦僵
摩詰凝碧池何如一樂倡論古非細苛烈節自有常
妖氛瀾日月陷窅自貽殃臨危思致命斯義久煌煌
罵賊慕常山不憚爲國殤顧念天性恩沉痛迫中腸
瘠顏稱錮疾遁迹入緇黃孤鳶挾腐鼠嚇我共趨跄
女子身從夫身玷寧自戕丈夫異巾幗所志各有將
惡艸疑楚師疾呼敗苻羗鸚鵡折其翼返周亦爲唐
忍辱苟有就豈復惜行藏隻手難迴天心苦獨徬徨
脫身思遠引束縛加羈韁天威自有赫三年定鬼方

功不自我顯始願亦已償甘心伏斧鑕爲國肅紀綱
瀝血陳劉詞激切感天潢高厚

聖主恩覆載荷汪洋溝瀆延視息俯仰皆慚惶與君千里
隔惘若魂有亾已分生死訣乍見爲傾觴君節誠不
虧鼓柝歌滄浪蠟書達北闕義聲動廟廊傳聞多恍
惚贈我盈縹緗吞聲不忍答恐非名教芳貞心苟自
諒不藉史筆揚天地豈不廣日月豈不光運會遺屯
塞耻復述短長高堂雙白髮所急在糗糧四壁如長
卿承歡乏水漿

君親兩不報興言滄成行君答謂我語奚必守故疆清溪
稱奇勝風土亦泱泱麋鹿足山珍木多鱖與魴子盍
行往觀卜築碧山傷我意爲君開促駕束嚴裝道經
龍江隈云是近戰場空山寒白骨落日照頽墻黔首
亦何辜掩袂增悲涼跋涉積晨夕溪流遙相望山川
紛糾盤佳氣亦蒼蒼精廬隱溪竹荔陰覆迴塘遊子
喜通謁因知世德昌君家有大阮雄辨挾風霜談溪
夜不厭素月落東廂昆季皆奇偉天家待棟樑精思
張平子博雅蔡中郎玉樹秀紛錯姻婭盡珪璋比屋

聞絃歌童叟樸以莊豈繫德星聚自是君子鄉人文
既披挹巖谷恣翱翔探泉凌絕巘度澗涉飛梁短棹
蕩中流度曲叶笙簧酒酣天風來清興欲飄颺忽計
倚閭久言歸駕小航歸來述此况聊以慰高堂結茅
雖未許中情愉且康離懷縈遠夢中夜起如狂南望
舊遊地烟樹隔微茫何以酬嘉惠摛詞代篚筐我意
良苦辛詞促意不彰君今際雲衢矯首奮騰驤我本
野鶴姿鹿門自徜徉浮榮非我羨君無爲我傷

聖王方求衣宵旰問未央書生愧撓螯何以效勤勩南山

有朱鳥其名爲鳳凰高梧萃且萋引吭鳴高岡仁心
敷惠質景運叶休祥非藉五彩姿爲國輝文章君自
識此意納牖義所當西征鞞鼓震久戍缺斧斨哀哉
楚與蜀沉淪刀箭鋌安得盡李郭捷伐早用張輸輓
恃東南閭閻竭橐囊鞭撻致芻藁半蝕蝨與蝗但聞
歌碩鼠無復咏甘棠外患不足殄內匱實可防海濱
子遺黎披雲望

帝閭供億苦經營婦子甘糟糠殘喘尚未蕪剝膚重補瘡
翩翩多紈綺撫字愧循良賣刀未買犢餘孽復披猖

衆志未成城癩憂實以痒天光徹蔀屋寧俟開廩倉
貪風苟不戢無以掃攬槍醫急亦治標緩恐入膏肓
監門尙有繪忌諱安所妨君行應努力寒谷待初暘
我跡雖江湖國恩詎忍忘對人說忠孝努力事耕桑
願從干羽舞車書其一匡聖德動皇天今始降豐穰

附李厚菴原贈詩

昔我髫年日落莫無與儔懶慢遂枯兀有如絕世
遊上慕伐木詩豈不懷所求莫構塤箎侶敢辭窮
谷幽歲行在降婁微名得濫收駢肩三百士濟濟

聽薪爇于時爾最少頎頎來海陬聲華壓碩望羣
公抉其眸稚圭新氣度衛玠舊風流人皆賞世資
我乃期前脩駸尋彙晨夜私心愜所籌肝腸一劍
古意味兩膠投陳言不我厭奧義或相搜朝來必
至暮夜過每同裯自此比蘭金不復判薰蕕道藝
互敦勗出處擬爲伴繼跡辭京都萬里拏回舟相
望室豈遠典思駕還悠荔陰有舊訂野寺期冥接
風塵忽造次災星纏斗牛君爲城市客何以脫置
罟雙堂高白顛哭淚劇啾啾平生所期願忠孝等

無尤如何兩難處吁嗟命不猶炳炳丹青中曾多
此事不我亦遭羅網蒙難一相摟感慟無可說天
昏日月愁臨別作訣語爲我羽聲謳歸來背針刺
無力相隱憂春風魂夢亂積夜見綢繆覺後循今
往漬衾雙淚流天氣一閨變鬼方三年休首惡旣
服舍孤臣爾何訖李陵不負漢梁公亦反周斯義
昔所尙顛趾轉爲猷高明神者惡大命匪人謀深
恐音息假蘭蕙委荒丘轉轂信難測蓋棺事乃道
天遣重相見莫嫌彌月抽

黃叔威以古詩八首見贈擬古妾薄命以答之
邊城多悲風夏首寒猶積急管雜繁聲哀歌動羈客
借問歌者誰無乃蕩子妻窮巷有佳人前訴欲含啼
自言良家子十三工織素十五善裁衣慧心兼欵步
讌婉及良辰幸得事郎君靜好諧所願白首訂慇懃
悠悠歲月晚漫漫關河遠握別事歸寧臨岐多繾綣
回首暗風塵霜雪阻河津已分身從夫柰何戀所親
巖高不可越川廣不可沒妾淚如崩泉妾心如明月
蛾眉起愛憎白璧玷青蠅君子聽非偏契濶信無徵

上天無私覆日月無私照心傷分棄捐心痛不可療
匪痛髮無沐匪痛容無澤巾櫛誰代司君子情無懌
竊聞東隣姊盛顏世所稀含吐氣如蘭綽約嬌羅衣
少小工織錦天章麗雲漢裁爲黼黻裳火龍同爛熳
如何守幽貞不字十年婢安得彼美姿一慰君子情
阿姊識我意粲然啟玉齒阿妹意良苦古義何所似
昔有秋胡妻心乖寧自戕安能忍垢辱他計行與藏
亦有谷風詩梁笏斲所遺柰何躬弗閱欲慰所後爲
妾心如夢中恍惚縈心魂一聞阿姊言涕泗如河奔

君子非我捐妾行自多咎速隕亦明心懼傷君子厚
妾義無可贖妾心安忍訣流蘇翠羽帳差奉後人悅
阿姊善事之百歲以爲期勿訝妾薄命嘉會故遲遲
賣珠聊止饑牽蘿聊補屋甘心償昔愆安得辭笑獨
孤獸走索群寡鵠號及晨我命實不猶我意良苦辛
訴畢縱悲歌永夜泣幽咽邊風動地來長夏爲飛雪

附黃叔威原贈詩

亭亭嶧山桐挺立百尺強勁幹自孤直其上巢鳳
凰顧盼文采殊黼黻藉生光衝風起天末羽毛忽

摧藏斥鷃空見嗤
運會曷有常
君看九霄翻雲路
終翱翔

喬松聳青巖
敷根如虬蟠
纏綿兔絲交
引蔓防幽
蘭夙昔携手好
安居託清歡
翻覆在須臾
對面生
波瀾屈辱困
神智啟此憂
患端周道君
莫嗟結交
古所難

久客艱道塗
廣漠暗風塵
凜凜霜雪中
殷勤素心
親蹇拙靡有知
君應取我真
清談析疑義
宴飲當
佳晨丈夫意
氣合千金非
所珍願從結
珮遊高舉

捫星辰

荆卿適秦時白虹貫陽精耿恭禱泉水出地洗波
生造化爲之動所感由至誠君奚運處屯金石徒
含貞浮雲翳層霄日月難爲明天道有傾仄我懷
何時平

長歌音軒鉤短歌聲激楚憔悴澤畔行哀怨自終
古至性萃君親讀者咸悲憫得失奚足問英雄任
鼠虎魚目矜夜光薄俗難與伍風雨課荷鋤衡門
掩香杜

此邦昔箕封禮義有本源幼安繼居之德厚俗彌
敦清風去千載非君孰爲宣否臧握麟管文獻賴
斯存皎日方寸心萬古經乾坤矯首東山詩風雷
動歸轅

東海近几席彷彿見蓬丘初日照珊瑚煜爚丹霞
流桂旗何晻藹颺車馭輕虬清虛含變化長生如
可求曷爲自拘束蹙蹙生煩憂達觀貴任運萬物
皆虛舟

園葵綠漸舒夏日亦已長天風悠然來冉掩素琴

張衆賓集高軒玉珮紛成行中坐起爲壽辛苦持
一觴人生聚會難倏忽成參商安得乘黃鶴一舉
凌八荒

華嚴嶺

五岳峙方州臺峰爭鼎闢疊嶂凌空冥蒼茫烟霧隔
東麓聳華嚴奇兀分主客遠望但蒼翳繞趾憚躡屐
飄風怒崩崖奔泉咽亂石徑轉漸窈深千尋列檜栢
雜樹紛榛蕪衰艸互狼籍披荆歷磊砢天地忽迫窄
群巒相束縛嗟峨懸峭壁林杪逗日光掩靄如將夕

出谷謂窮際危峰尚如戟其巔若可躋縈迴極盤躡
四顧寂無聲樵蘇不畱迹落葉墮空山如聞人咳唾
艸樹此俱枯窮寒絕地脈清非神明都險實虎豹宅
僕馬俱已疲停鞍聊躡躑俯視所歷峰點點俱空碧
日昃下層岡遙遙度阡陌居人驚我來相問咸踈踏
此山實奧阻往來道不借鷲獸恣吞攫壯夫亦裂魄
回首意悄然雄懷爲不懌丈夫志四方乾坤寧跼蹐
登臨戒高深步趨亦謹擇旣非事王程胡爲輕自適
高堂方寸心寒暑未安席履坦猶多虞聞此心魂圻

戒哉人子軀無事慎行役

松樹爲風雨所拔嘆

城南山半古梵宮喬松千尺獨凌空螭蟠虬結逞蒼
翠扶植全憑造化功七月清秋風雨惡裂石崩崖氣
磅礴花卉摧殘不知數萬樹龍鱗盡剝落勁幹何難
與風爭失勢恐被連根折枝條荏苒任飄零苦心獨
守凌霜節離披偃仰仍倔强道傍識者多嘆傷歲寒
老樹尚如此何況朽木與枯楊風清雨霽會有時結
蓋摩娑挿霄漢寄語山靈好護持留取天家作楨幹

贈黃西津總戎海澄

天狼搖精動輦鼓海國霜飛紛白羽妖蜃噴霧障九
天鮫穴瀾翻壯士怒黃公氣貫日月光神武不數張
睢陽萬里孤軍撐地軸腰間龍劍耀星芒長鯨席卷
突城下崩奔聲撼武安瓦肘腋姦兇夜縋軍我公拔
劍面如赭忠魂慘淡斗牛寒闔門殉國身同丹將軍
飛鞞摧鋒出間道徵兵望賀蘭長安遠道聞消息

詔憫孤臣常惻惻重關電掃海氛清握鉞分符

聖恩特南來萬騎勢如雲報主復仇盡義軍三年鬼國初
投欵八日平么應待君愧我幽囚身困辱長夜淚枯

天復旭感君烈節送君行淋漓慷慨歌相續

劍俠

吳鈞鐵冷霜花碧寶鞞螭文嵌瑤石繫馬城南倚酒
鑪慷慨悲歌道疇昔十五從師學遠遊技成豪氣橫
九州丈夫有志酬知己千金豈肯殉王侯淪落江湖
無可說夜中起舞腸內熱探匣一吼老龍驚模糊猶
帶髑髏血此君周旋久且長相握相親泣數行翻身
躑躍玉鋒閃月落庭空繞電光電光初凝日光赭金
鞍斜控銀驄馬西風獵獵雪將飛意中誰是報恩者

肝膽何須向人論
揮杯彈鋏南城下

題友人墨竹

許生磊落多英特
興到狂呼潑墨汁
巧奪瀟湘倒影
來淋漓元氣毫端集
排石穿雲勢傾側
亂葉栖栖神鬼泣
勁節離披猶倔強
森然老幹如山立
聲吼九天雷雨寒
枝橫千尺龍蛇蟄
鶻落兔起不可狀
滿堂蒼翠風習習
伶倫已往嶰谷空
對此令人空嘆息
知君最重歲寒姿
好把畫圖溪處襲

行路難

嗚呼噫嘻行路難哉行人惆悵而心哀鴻濛剖關東
南摧箐篁叢谷何年開層巒爭地疊蒼翠狂泉奔壑
殷如雷陰岑蔽虧絕牛斗胡爲乎躡空攀險往來哉
越地初盡吳山逼環折渾茫盡澤國黃河東注縱橫
奔千尺長堤爲坼副江淮南北化爲魚鬼泣神嚎天
闇黑行人五月涉炎鄉流金爍石汗浹裳萬里突無
烟安覓糧與漿揮塵清涼尚不可何況踉蹌策蹇大
道傍日中一震雷聲吼雲暗天沉昏白晝掣電翻風
沙蔽天覆海傾江人皆仆旱魃久虐下土嗟滯潦綿

連又爲疾此地蒼生困莫蘇行人寧惜沾襟袖遠奔
茅舍氣喘吁覓枝對竈燎衣裊臥見殘雲掩靄月隱
星疎又聞蟲聲蛙鼓喧淤渠嗚呼行路難不如早迴
車君不見翟公客郤平瓜貴賤今昔何所如死生艱
險苦相報相逢不如相見初丈夫志業不早就何事
侯門更曳裾又不見九關虎豹虓且噬浮雲蔽日孰
爲祛巫咸上天臯陶遠食玉炊桂不可居世路嶮巖
有如此試較山川阻深暑寒風雨孰易孰難歟嗚呼
噫嘻行路難不如早迴車此道今古同歛歎

海門行 爲海澄失守作

南溟毒沫翻潛鱷
跳浪揚鬣霧漠漠
夜半星飛白羽來
腥風吹斷海門鑰
海門岩邑小如罌
枕山砥瀾六鰲擎
五千犀鎧濯龍鱗
虎賁萬騎簇饗鉦
誰柄長竿驚一蹶
鈞沉餌冷逐波月
天塹不戒突艤艫
孤壁烟寒炊鼠骨
太陰壓城營頭流
殘角無聲聽泣鴝
將軍碧血淬吳鈞
饑烏日晏栖骷髏
秋老重泉氣未飀
靈旗偃偃長蛇腹
魂招不來馬革枯
酸心北向啾啾哭

丙辰春日登凌霄

獨立高岡上蒼茫眺遠天河山非故物花鳥入新年
衰隴餘荒草空江冷暮烟春光渾不覺惆悵自傷憐
春暮過烏龍江戰地

海國兵戈後蕭條異晚春空山寒戰骨落日恐行人
燕去餘荒壘烏啼集短圍蠲租聞有

詔重念此方民

泉郡夜半聞警

細柳軍威肅金墉百雉牢未聞烽火警忽聽角聲高

陽山書堂集卷之二
婺婦悲寒緯征夫拭寶刀天威應有赫螻蟻已潛逃
留別許不棄

共爾艱危後如何遽遠行祇緣岑寂慣反覺別離輕
海角孤臣恨天涯遊子情臨岐難細說回首涕交橫
建溪舟行

布帆三月暮旅興續春游新漲平江樹閉花護客舟
自多辛苦志敢作稻梁謀入眼溪山好徘徊興更悠
又

天開閩越險移棹向山行衆水爭流疾危灘奪地橫

轉帆看鳥影側耳盡雷聲閱盡風波後漁歌一曲清

又

曲折移舟過探奇不厭頻遠村皆入畫怪石盡爲隣
山勢隨流合溪光逐棹新白鷗齊上下若箇是閑身

又

違親愁作客弟復逐兄行本痛孤臣恨翻傷遊子情
九閣誰代達十畝自堪耕但得天光照溪山早結盟
雨夜泊桐廬

烟雨合冥濛輕舟入畫中星光連水白漁火映江紅

開山書堂集錄 卷之二
古寺疎林繞前村小渡通投竿堪寄興何事嘆飄蓬

吳門觀競渡

悽愴招魂事吳門獨壯觀龍標搖落日鼉鼓逐風湍
千載孤忠恨今人一笑看俗情原自爾嘆息爲停餐

崇明渡海

危檣乘雨霧破浪逐長風排盪開懷壯渾茫入望窮
乾坤歸一氣日月浸虛空屐齒登臨遍何如此擅雄

雨中望金山

輕櫓隨潮轉看山八面奇烟雲添黛色風雨洗新姿

塔影當空立鐘聲渡水遲
江天橫砥柱作鎮鎖蛟螭
寶應道中

千里長淮道蕭然曉夜行
魚龍依積水星月伴孤城
天際危檣靜烟中遠樹平
僕夫初作客對此不勝情
淮上阻水小舟夜泊臺兒庄

雨漲江平岼柴門掩水中
漁舟橫曲港破網補疎篷
電過孤村白雲沉四野空
襟懷平日壯到此嘆途窮
寄家書

雙魚珍重去何以慰高堂
跋涉身猶健詩書典更長

天心懸日月臣節待封章祇恐承歡缺誰爲繼糗糧
燕邸書懷

蟬聲鳴古樹萬物已迎秋恐動高堂念寧堪遠地留
天心應厭亂臣節矢同仇何日烽烟靜滄浪一釣舟
作書友人投筆誌恨

我志原何許逢人却乞憐是非留竹簡方寸付蒼天
耻作書空態寧尋買賦錢蓋棺他日事一息恨綿綿
又

天意困英雄常投錯節中風霜都可受忠孝豈堪窮

未死留殘局生存耻轉蓬悲傷巾幘氣翹首問蒼穹

寄長秋弟

落拓吾生事詩書汝好尋聊將辛苦意差慰老親心
秋色關河遍離愁歲月深新篇堪寄否天外待鴻音
夜坐聞笛

何方遊俠子急管奏新聲最是高秋夜偏傷遠客情
他鄉雲一色萬里月同明安得雙飛翼凌風入太清
月夜感懷

新秋澄爽氣何事障微陰稍喜清輝滿旋看隱霧深

雁聲催朔吹蛩響雜寒砧對此愁難寐聊歌梁父吟
歸懷

偃仰更何事歸期計尙悠蛩鳴空館夕雁度帝城秋
入夢多新句懷人悵舊遊焚香聊永日鄉思不能休
庚申上元同楊道聲題汴梁旅店

喜遂京華約初從宛洛期河山收指掌風雪壯鬚眉
令節依村店雄心付濁醪清談聊永夜差慰故園思

乙卯秋送友之延津

慷慨將陳行路難，啣杯此夕強相歡。
乾坤有恨憑誰訴，歌哭無聲藉酒寬。
九月霜清楓葉下，五更風急客舟寒。
延津北上經過地，回首應知涕淚潛。

友人問疾，座有鼓琴者，命余續彈，未果，因貽余詩，有琴聲無復後人彈之句，遂依韻和。

支離臥病空齋裏，佳客來過強作歡。
萬事盡從杯酒冷，此生已作戲場看。
雄才慚爾應難和，苦調逢人未忍彈。
往事不堪重記憶，五年燈火舊鷄壇。

哭范制臺

丙辰九月十七日

見說延津已倒戈，忽傾天柱意如何。
妖蟆不道終侵月，毒鱗寧當復湧波。
暫歛忠魂歸斗極，終留正氣護山河。
傷心萬戶無童叟，掩袂吞聲血淚多。

其二

却憶當年檠戟臨，隨車甘雨沛商霖。
萊公惠政遺恩永，常袞文章化澤深。
此日山川埋碧血，萬年風雨護棠陰。
英靈慘淡騎箕去，長慟誰明後死心。

秋興八首

丁巳季秋

風高氣肅火西流極目河山一望收四野旌旗戎壘
靜千家砧杵海天秋降王繫組新投欸大將橐弓好
運籌共唱饒歌歸北闕凌烟次第論勲酬

其二

海國烽烟數震驚

王師南下掃長鯨營連列嶠龍蛇陣氣壯空山艸木兵
伏莽賣刀依樂土遺民扶杖慶更生西風滿野歌鴻
雁安得循良翊太平

其三

七閩財賦甲南天萬井桑麻異昔年驛路秋殘飛羽
騎荒城日落起寒烟闈人漫唱悲笳曲征帥休歌采
芑篇欲使海濱銷戰氣伏波何日駕樓船

其四

凝雲掩靄萬山陰斗柄西移霜滿林叢菊遲開秋意
淡高梧未老早寒侵孤懷有恨畱青史流水閑情寄
素琴長劍倚天歌楚調淒涼宋玉少知音

其五

高樓獨坐意何如寂寞秋風嘆索居尙憶艱危良友

共敢云貧賤故交疎
霜天曉角驚殘夢
寒月孤燈檢舊書
檻外青山供嘯傲
更從何處問樵漁

其六

神京宮闕燦晴霞
南苑清秋泛

御艫槐葉乍飄開
桂子蓮房初老醉
蓉花虹垂玉竦三
千尺烟鎖金城十
萬家遙隔海天徒
悵望寒江露冷泣
蒹葭

其七

期門護蹕繞城臯
萬乘長楊擁羽旄
鐵騎霜寒飛艸

陸上書室集卷之二
疾蒼鷹秋健逐雲高爭誇鳴鏑催紅雨喜控歸鞍數
錦毛諫獵有書誰入告三年講武

聖躬勞

其八

當年起草侍明光鱸膾娛親請尙方

紫誥恩榮辭玉陛彩衣秋好舞牙檣群公贈別詞偏壯三
徑歸來菊正芳回首風塵縈遠夢高懷搖落任清狂
上巳日舟行遊鼓山

曲水尋春客與同漫招釣艇泛城東四圍野色晴光

裏一望松陰夕照中
入浦微茫茅店月
近村飄映酒旗風
登臨豈減流觴趣
共覓鐘聲謁遠公

宿解院

入徑山僧喜過從
追隨遙指最高峰
岩前老樹頻啼鳥
天半驚濤欲吼龍
江色靜涵初月照
寺門長倩白雲封
禪燈一榻塵心靜
曉起相招策短筇

湧泉寺

山半深藏古刹尊
紆迴屐齒疊苔痕
風傳松籟渾鐘響
雲護山光失寺門
俗客少過偏適興
老僧靜對更

閑上書堂集卷之二
忘言桃源路杳靈源近漫學逃禪且避喧

登劣崩峯

躡屐攀躋興自豪穿林覓徑入雲高天風飛送千尋
瀑海日晴翻萬里濤近郭桑麻開繡壤滿城烟火雜
征旄東南戰氣何年息我欲長竿釣巨鼇

其二

層巒高處俯晴穹八面奇觀迥不同雙島浮沉青靄
外萬山離合白雲中泉歸洞壑聲聞靜天入滄溟法
界空對此心神應共曠更思乘興御長風

立秋後一日至都門卽事賦感

秋風昨夜到長安
客子朝來喜解鞍
萬井桑麻依日月
九天閭闔盛衣冠
傾裝獨嘆貂裘敝
對酒高歌行路難
遙向五雲深處望
低徊今昔倍辛酸

又

共喜甘霖逼近畿
又傳南國羽書飛
期門萬騎增闐闐
徼河戍千艘解楚圍
籌乏司農愁仰屋
秋深征帥賦無衣
纍纍捆載呼關人
尚有盈裝解組歸

又

開山書堂集卷之二
五年烽火照京都景物豪華尚不殊寶馬仍塵三市
路繡車猶擁九通衢

廟謨指日安樽俎民痛何時入畫圖最是天南濱海地魂
招不盡髑骸枯

又

蒲輪初下慶彈冠鞞鞞高懸諫路寬

聖主疇咨今已切群工補袞豈辭難珠沉滄海光應現鳳
翽朝陽彩自丹盛事諸君同努力孤臣拭淚望金鑾
潞河卽事有感贈主人

嗟峨雉堞聳雙城烟火如雲翊帝京玉粒千倉司計
簿牙檣萬櫓隸虞衡長堤柳暗看車擁繞市花明簇
仗行此地賢豪猶忼慨慙慙投轄古人情

易水懷古

國士由來重報恩當年成敗未須論精迴天地虹先
貫劍叱羸秦氣已吞燕市月明淒擊筑金臺風急冷
歸魂河流嗚咽增憑弔策蹇城西日欲昏

擬遊五臺山不果

五峰天半鎖烟霞寶藏珠幢釋子家勢控太行蟠巨

開山書堂集卷之二
鎮派分靈鷲落曇花寒深六月常飛雪塞近三秋早
聽笳策馬長安看未得西風回首暮雲遮

楊椒山先生祠

當年諫草烈秋霜國士同聲振廟廊化碧有懷酬俠
客控寃無路達天王爨開馬市英魂恨廟煥瀛洲俎
豆香將相負恩何代少先生千古一封章

宿桑乾題壁

策蹇西風度板橋神京咫尺入雲霄羽書夾道披星
疾遊騎千羣逐草驕幾處烽烟歌衽席何年山海晏

漁樵杞人有恨重閣隔長嘆更寒坐寂寥

已未入都江干留別諸同學

支離南北老風塵書劍重驚萬里身病擬王維終負
國檄慙毛義竟違親烽烟滿目誰安枕霜雪前途客
問津尙有舊遊憐潦倒江干分手暗傷神

寄三弟

汝幼寧知行路難片帆衝雪踏風湍須知客况經年
瘁祇願親心一旦寬襪被長途如見憶書聲午夜莫
辭寒宵將攻苦娛晨夕倘慰高堂得笑歡

西曹坐繫書懷兼寄兩弟

方寸誰明謗早侵蠟書偏阻爰書尋代桃禍豈同根
致投杼疑緣三至深摩詰祇慚留病骨鍾儀猶憶秦
南音可憐園土今朝事七載孤臣日夜心

又

折鸚踪跡豈浮沉桃李阿誰用意深朱序敗秦非後
隊陳平間楚未捐金虹流此日猶難信碧化他年倘
見心逃賞介推徒自苦焚山何事禍相尋

又

焚山介子異彈冠晉室酬功死亦安脫兔已非傷離
畢射烏偏誤指啣環

君親兩繫分心苦利鈍殊觀辨志難敢擬鴟鴞訴恩怨風
雷應識

聖朝寬

又

三木關身古所傷可堪縲紲百鈞強酬恩舊擬嬰同
杵信誓誰知左負羊

聖聽自聰難蔽日臣寃終洗莫飛霜絳侯未短英雄氣獄

吏由他貴不妨

又

生來傲骨太嶙峋
天遣銀鐙試此身
長咏楚詞聊當
哭靜探周易已忘辛
淒涼入夢呼

明主瀟灑題詩慰老親
吾弟幼期文信國
勤思忠孝莫傷神

東行口占三律

襤被登車謝九關
三年囚首一身存
賤同厮養孤臣
分生到邊廷

聖主恩籍削寄名歸卒伍魂銷憑夢返家園白雲南向腸
婁斷鶴髮東風正倚門

又

慷慨休歌行路難安排隨地

聖恩寬牛車未免煩田老升斗依然仰大官瘦骨可堪邊
地苦敝裘寧耐朔風寒臨岐不灑傷心淚憂

國當年淚已乾

又

風塵三載羽書馳填海曾聞精衛悲豈意上官專草

藁翻令巷伯嘆南箕鑠金祇爲招羣忌投杼何當慰
母疑行矣

帝鄉猶未遠差勝凝碧望闈時

癸亥春日卽事

遼海春回襍被溫東風立雪滿蓬門詩書課業儒生
事牛馬行藏

聖主恩病後關心惟藥裏愁中入夢是鄉園願天長與高
堂健遊子飄零淚暗吞

其二

陪京佳氣自葱芊比戶銷兵講誦絃避地敢同王烈
隱傳經應愧管寧賢江湖已縱禽魚樂草木猶期雨
露偏

聖主恩深應有日倚閭愁望又經年

灌花卽事

數畦樊圃隔囂塵縛竹編籬野色新偶爾荷鋤忘讀
史恰當抱甕喜逢賓灌濡聊寫林泉事霖雨還須天
地仁取次綠陰窓外滿一杯遙對故園春



[Faint vertical text, likely bleed-through from the reverse side of the page]

贈祕書覺道弘五十韻

廟畧資神武軍諮待俊英
驥騰千里駕鶴奮九臯鳴
玉葉宗支貴金貂祖烈宏
丹青思舊德帷幄震先聲
草起鸞坡重經修虎觀成
錦袍朝賜渥蓮炬夜歸榮
節帥初推轂儒臣暫請纓
將星箕尾動紫氣斗牛橫
業富三千卷胸羅十萬兵
檄書飛麗藻羽扇警威名
傳箭呼關入投鞭繫組迎
浙東牢鎖鑰海溼肅旌旌
露布降封豕瑠戈掃孽鯨
韜鈴入幕祕紀律誓師明
執法推王猛參戎數子荆
七閩閭井晏百粵版圖并

毒鱗潛吹浪天狼暗射精啣枚趨鳥道卷甲護巖城
小醜宵中遁遊魂釜底驚獨猜淮蔡令安堵渭濱營
調劑心多苦綢繆念獨忤殘疆勤撫輯反側殫推誠
李佑恩終報嚴顏意共傾縱擒操掌握談笑寓權衡
霜鏑揚輝耀冰壺濯品瑩公忠釐耗蠹正氣懾颺旌
松桂孤芳潔崑崙獨柱擎任同莘野相志切洛陽生
壁壘經區畫氛霾漸廓清蠶桑催夜杼襁褓起春耕
禁飭關津擾威消雀鼠爭政閑知興逸帶緩御裘輕
彩句奚囊滿牙籤鄴架盈風騷追漢魏音響叶韶謨

梁翰多高癖臨池擅勝情龍翔形屈矯虎臥勢崢嶸
具美難綜述兼長漫騰評明堂稱鼎鼐清廟寶蔥珩
舊忝簪裾侶新聯車笠盟運屯方寸蹙神辱夢魂攖
積恨真如疾殷憂未解醒燕臺閣尚隔故里跡猶磴
落魄依嚴武窮途諒晏嬰披襟聊永日剪燭共殘更
躓步傷狼虺忘形信鳥嚶軍容瞻整暇勝算識鏗鉤
里巷多謠咏章縫廣頌賡南邦資屏翰王國萃休禎
銅柱看勲勒沙堤卜築行共瞻東壁煥行覩泰階平

贈臬憲于公

鴻圖開景運昭代蔚名臣物論推三晉廉風振八閩
鄭公方奏簡廷尉正埋輪北闕嚴霜肅南邦化雨新
聲華稱伯仲評騭擬儔倫天意將澄濁儒修欲返淳
廟廊憑柱礎冰雪挺松筠離石原營趙西汾舊入秦
地靈通冀北象緯逼參辰此日朝思黯當年嶽降申
縹緗雄麗藻韋布富經綸鵬奮搏豐翮螭蟠起巨鱗
銅符分象郡墨綬渡蠻津誰識范丹守猶甘原憲貧
花深時伏雉釜冷尚懸鶉司戶忠堪式宗元訓仍遵
祿微堅砥礪俗野急陶甄製錦功偏著鳴琴政自循

襄帷巴子國攬轡墊江濱
標悍竇渝習蕭條兵燹民
烟霞清吏伴稗叟使君親
王濬恩何厚文翁化更馴
雄飛勤剔歷幹局歷勤辛
黃綬榮增秩朱幡寵賜銀
竹樓尋勝槩赤壁溯芳晨
邛樊傳烽遍斬黃伏莽頻
憂深懷擊楫敵迫奮忘身
買犢思明信投戈感至仁
從容殲小醜談笑靜邊塵
奏最方州轄分旄別部巡
半千文教盛齡石武功振
湘漢行傳檄滄溟未格器
精誠通帝座聲價徹楓宸
欽卹咨明允瘡痍藉度詢
玉壺澄凜冽喬岳聳嶙峋
拔薤豪宗屏鞭蒲國憲伸

網疎囚引法簿決吏驚神貫索氛皆淨梟槍彗漸泯
撫時常欵欵誨屬必諄諄應識苞苴杜共知表率真
章縫延講課棧樸廣搜掄櫛楔歸斤削鋒莖待冶鈞
公忠扶士氣卑牧接儒紳駑骨慙資劣鯁生恨數屯
分知安檣櫟情忍戀鱸尊枉騎欣瞻斗登堂飫飲醇
遺家僅一絹投轄竟經旬聽納葑菲採疎狂草野陳
台衡需晉鼎海宇佇回春里曲詎阿諛風謠附雅幽
題寧海將軍白沙受降圖

神武歌

元后師貞美丈人尅降專佈德服國務全民天討原無敵
王師自有真投戈開壁壘傳檄靜烟塵畫戟凝霜列
牙旗耀日陳淮西同入蔡軹道異收秦角吹偏寒膽
江流不洗顰羊牽詞澳泌組繫意逡巡盆子餘生厚
懷光賜券頻韜鈴安反側干羽格凶囂宵小驚恩渥
閭閻喜化新壺漿歡穉叟歌舞選城闌氛廓河山靜
陽回艸木春行看波蕩鱷取次閣圖麟

...

瀨溪道中

瀨溪古道少人行
落日愁雲旅思驚
茅店數家鷄犬
靜空山但聽鷓鴣聲

自題小影

問余何事碧山岑
十載臣心寄素琴
彈到商絃多苦
調松風蕭颯萬山陰

題寧海將軍鳳城歸欵圖

枕椰溪處

詔書頒翡翠明珠欵
漢關錦石峰頭花
萬樹從今移種鳳

鳳山

耿又樸年兄以三絕句見慰走筆步韻志感

索米長安亦

聖恩途窮難望叩天闈陽春誰唱婁商曲羈客青衫濕淚痕

又

雁足虞羅竟渺然尚畱方寸對蒼天

君恩本自同慈母投杼何堪衆口傳

又

覆盆無路徹
楓宸谷口何當返
子真萬里高堂嗟
菽水

君親兩負倍傷神

行受諸員餘餘餘
本
關全書報前屬家谷口所書恐不真萬里高公

跋

沉寃望雪曾傳吳市之簫急難號天爰下秦庭
之淚亮孤忠於旣放不廢行吟慨古道以誰存
何妨廣論顧汙不至阿其所好廼物不得其平
則鳴惟我

主人清白承家慷慨賦性四海交遊共識心胸
冰雪十年染翰無非忠孝文章慨鬼方變起倉
皇痛元直願違方寸陳平間楚萬金孰信扶劉
秘計朱序散秦一唾可知爲晉潛身節幸生全

衷難上白盼

君門而躑躅須邛友以披陳豈意對面九嶷前言一
抹貪天功爲已力掠人美以自榮反覆遽起於
盟山呼吸莫通於

帝座魏齊讒客尙解憐寒王詡門人偏能計別幸遇
聖主恩深貸矜疑於不死猶冀良朋悔禍民幽憤於
無言曾達尺書載修規諷以德報怨誼斯厚矣
割義成讐情實傷哉某廝養賤軀顛蒙下走心
戀方回之側當奴匪日知文神依穎士之傍愛

才自不能去目擊卮危之慘腸應迸裂之餘憶

昔五臺迎

駕泣疏蚤阻於櫻鱗擬今九叩司

關尸諫旋擗夫剖腹第勢猶格於投鼠恐愚適等於
抱薪曲狗周咨紆從衆沮惟念魂銷雪窟

丹書未逮夜郎淚盡水天皂帽尙羈遼左是用蕪檢
奚囊薰翻枕秘鴻篇千什全梓力尙未遑猿淚
三聲變徵期先助歎倘

仁人君子用心自有至公斯逐客孤臣望眼不終

飲恨

九重非遠天雖高而聽卑
片紙行傳日有明而光照
不揣冒昧竊附縷私幸鑒宥
其僭踰祇俯原夫
哀激云爾

受恩舊僕楊昭百首敬跋